

Las regiuns ston sa concentrar sin l'essenzial

Il cussegl grond è sa fatschentà cun la promoziun economica

DAD ANDREAS CADONAU

■ **Quant sustegn statal basegna l'economia grischuna? Quai è stada ina da las dumondas che han fatschentà il cussegl grond ier. Deputadas e deputads han discutà il rapport da la regenza grischuna davart il svilup economic dal chantun Grischun.** «Vus na decidis oz betg davart ina nova lescha e vus na decidis betg davart in nov credit.» Malgrà ils plets dal cusseglier guvernativ

Hansjörg Trachsel ha il rapport davart il svilup economic dal chantun Grischun fatschentà intensiv deputadas e deputads. Gia la debatta d'entrada a la fatschenta ha intimà ils commembers dal parlament grischun ad explicaziuns detagliadas davart la strategia chantunala areguard l'economia. Ina strategia circumscribta en in messadi da 300 paginas e concentrada en curtas directivas per promover ils singuls secturs economics en il futur. Ina pretensiun formulada en il messadi ha levantà reacziuns principalmain da represchentsants da la periferia. Il deputà *Robert Heinz* (pbd Avras) ha titulà l'expressiun «planisaziun da desister» per il pled il pli trid da l'onn. Ulteriuras deputadas è deputads han exprimì lur quitads che la strategia da promover l'economia grischuna quintia da sustegnair sulet ils fermes e da traschar regiuns economicamain flailvas. Tant il president da la cumissiun per economia e taxas *Urs Marti* (pld Cuir) sco il cusseglier guvernativ *Hansjörg Trachsel* èn sa spruvads da quietar las temas da deputadas e deputads. Tenor *Hansjörg Trachsel* vul il chantun adossar dapli responsabladad a las regiuns da definir lur strategia economica. Quai pretenda dentant da las regiuns da tschentiar prioritads e da sa concentrar sin igl essenzial. «Nus essan da l'avis che las regiuns ston formular lur basegns economics e betg il chantun.» Tenor il cusseglier guvernativ saja il



Il cussegl grond ha discutà las perspectives economicas e las incumbensas dal chantun da promover quella economia.

FOTO Y. BÜRKL

chantun pront da sustegnair las stentas economicas da las regiuns. El ha taxà per impurtant che las regiuns defineschian centers regiunals cun ina buna purschida tant da servetschs sco da plazzas da lavur. Sco in bun exempel ha *Hansjörg Trachsel* numnà la citad da Glion che prestia quella incumbensa da center.

Buna notas per il rapport

En general ha il rapport dal departament da *Hansjörg Trachsel* retschavì bunas notas da deputadas e deputads uschia che la decisiun dad entrar en la fatschenta nun è stada dispitaivla. Il rapport è vegnì pretendì dal president da la fracziun cristiandemocratica *Marcus Caduff* (pcd Lumnezia) a chaschun da la sessiun d'a-

vrigl. Da princip è er il deputà lumnezian cuntent cun il rapport. El avess dentant giavischà ch'il rapport sa focusseschia pli fitg e defineschia ina pli clera posiziun en ils singuls secturs. A *Reto Cramer* (pcd Belfort) mancan cleras strategias envers la depopulaziun ed el ha discursi da depressiuns provotgadas da la lectura dal rapport. Era *Jürg Kappeler* (pvl Cuir) ha discursi dad in maletg trist designà da la regenza. In pau surstà è il deputà dals verd liberals da la conclusiun da la regenza da renviar la necessitad da reveder la legislaziun sin fundament da las conclusiuns economicamein pauc agreablas. Schizunt ils represchentsants da la pps han vesì aspects positivs en la lavur dal departament da *Hansjörg Trachsel*. *An-*

drea Davaz (pps Maiavilla) ha pretendì da la regenza da spargnar e tuttina investir en il futur. Dapli libertad per l'economia privata ha pretendì *Rudolf Kunz* da la pld (Cuir). El ha discursi dad ina surreglamentaziun da l'economia. Or da sia optica na vegn la promoziun economica betg dal stadi, mabain dals privats ed els stoppian posseder in bun clima e spazi da sa sviluppar. Per exempel ha menziunà *Rudolf Kunz* in bun clima fiscal. Naging spazi per sbassar las impostas ad interpresas vesa dentant il deputà *Jon Pult* (ps Cuir). L'innovaziun muventa tenor ses avis l'economia ed el vul investir principalmain en la furmaziun per promover in spiert innovativ en il chantun Grischun e quai sin tut ils secturs.